

समां - 12:25 hrs.

CM Appointment Letters

मुख्यमंत्री उमर अब्दुल्ला हों श्रीनगर दे शेर कश्मीर अंतराष्ट्रीय कन्वेंशन सेंटर च आयोजित इक समारोह दुरान सेहत ते मेडिकल शिक्षा विभाग दे नमें नियुक्त मेडिकल अफसरें गी नियुक्ति-पत्र भेंट कीते। इस मौके उपर मुख्यमंत्री हों इन्हें अधिकारिणं गी सरकारी सेवा दा हिस्सा बनने पर मुबारकबाद दिती ते कन्है गै गुजारश बी कीती जे ओह अपनी इस नियुक्ति गी लोकें दी सेवा लेई समर्पित इक नमें ध्यास दी शुरुआत दे तौर उपर दिखन। इस मौके किट्ठ अगगे भाषण दिंदे होई मुख्यमंत्री हों आखेआ जे इस नियुक्ति दे कन्है मेडिकल अफसरें ते उंदे परोआरें दी केई बरें दी सख्त मेहनत इक मुकाम धोड़ी पुज्जी गेई ऐ।



Samba Battal Road

सांबा-बट्टल सिङ्कै दी मरम्मत-सुधार करिये इसी तौले गै मता शैल बनाया जाहग ते इस कम्मै लेई 38 करोड़ 84 लक्ख रपे अलॉट बी करी दिते गे न। केन्द्री मंत्री डाक्टर जीतेन्द्र सिंह होरें सोशल मीडिया मंच “एक्स” पर इस बारे ब्यौरे सांझे करदे होई आखेआ जे मुकामी बसनीकें गी एह् भरोसा दिता गेआ हा जे सांबा-बट्टल सिङ्कै दी मरम्मत सुधार ते एह्दे लेई लोड़चदी रकम जारी करने दी मंग गी तौले शा तौले पूरा कीता जाहग। उंनै

आखेआ जे एह गल्ल सांझी करदे होई उ'नेंगी बड़ी खुशी होआ करदी ऐ जे सीमा सड़क संगठन ने सांबा-बट्टल सिड़कै दी मरम्मती-सुधार ते इसी मता बेहतर बनाने लेई 38 करोड़ 84 लक्ख रपे देने लेई हुक्म रसाल करी दिता ऐ। डाक्टर सिंह होरें आखेआ जे इक हफ्ते दे अंदर-अंदर एह रकम जारी करी दिती जाहग ते बड़ी तौले गै सिड़कै दा कम्म बी शुरू होई जाहग।

<><><><><><>

CS Infra Devp Progs

मुख्य सचिव अटल डुल्लु होरें जम्मू-कश्मीर च ढांचागत ते संपर्क विकास कार्यक्रम तैहत हासल प्रगति दी कल समीक्षा कीती जेहदे तैहत समूलचे केन्द्र शासत प्रदेश च राष्ट्री जरनैली सिड़कें, सुरंगें, फ्लाईओवरें, लौहकी पुलिएं, पुलें, रिंग रोड ते सामरिक महत्व आहली होरनें संपर्क परियोजनाएं गी तोढ़ चाढ़ेआ जा'रदा ऐ। जरनैली सिड़कें ते सुरंगें सरबंधी परियोजनाएं च हासल प्रगति दी ब्यौरेवार समीक्षा करदे होई मुख्य सचिव होरें इस सरबंधी च ठोस ब्यौरे मंगगे ते इ'नें परियोजनाएं गी सबूरा करने लेई तय कीती गेदी समें-सीमा दे बारें च बी जानकारी हासल कीती। इ'नें बड़्डी संपर्क परियोजनाएं दे महत्वै उप्पर लोs पांदे होई डुल्लु होरें सूबाई ते जिला प्रशासनें गी निर्देश दिते जे ओह कम्म तोढ़ चाढ़ा करदी एजेंसिएं दे कन्नै नेइमा तालमेल बनाइयै कम्म करन तांजे इ'नें प्रोजेक्टें च पेश औने आहली रूकावटें गी दूर कीता जाई सकै ते इ'नें कम्में दी रफ्तार लगातार बनी दी रवै।

<><><><><><>

CS-Migrant Property

मुख्य सचिव अटल डुल्लु होरें कल इक बैठक लाइयै कश्मीर संभाग दे सबनें 10एं जिलें च कश्मीरी विस्थापित संपत्ति धारकें आसेआ दर्ज शकैतें दे नबेड़े आहली प्रक्रिया दी व्यापक समीक्षा कीती। इस मौके पर उ'नें सूबाई ते जिला प्रशासनें गी निर्देश दिता जे ओह हर इक शकैत दी बरीकी कन्नै जांच करियै ओहदा नबेड़ा जकीनी बनान ते इस दरान मते चिरै थमां बकाया पेदे मामलें बक्खी पैहल दी बिनाह उप्पर ध्यान दिता जा। उ'नें जोर देइयै आखेआ जे हर इक शकैत दी व्यापक जांच होनी चाहिदी ते सरबन्धत संपत्ति मालकें लेई उचित ढंग्गै कन्नै ओहदा नबेड़ा बी करोआया जाना लोड़चदा ऐ।



IGP Jammu Foot Patrol

जम्मू ज़ोन दे आई.जी.पी तेजिन्द्र सिंह होरें जम्मू-सांबा-कठुआ रेंज दे डी.आई.जी श्रीधर पाटिल, जम्मू दे एस.एस.पी जोगिंदर सिंह ते एस.पी नार्थ जम्मू विवेक शेखर हुं'दे कन्नै कल जम्मू-नार्थ हलके दे इलाकें दा पैदल दौरा कीता। पुलसा दे इ'नें सीनियर ऐहलकारें सुरक्षा बंदोबस्तें दी निजी तौरा पर समीक्षा कीती ते इलाके च कानून बवस्था दी स्थिति दा जायजा लैता। इलाके दी पैदल गश्त दरान इ'नें अधिकारिणें मुकामी लोकें कन्नै गल्लबात करियै सार्वजनिक सुरक्षा सरबन्धी चैंताएं दा आंकलन बी कीता। इस गैंह दा मकसद, आम लोकें ते पुलस बश्कार रिश्ते गी बेहतर बनाना ते भलेआं हेठले स्तर उप्पर आम लोकें अंदर बसाह-भरोसा बधाना हा। पुलसा दे इ'नें वरिष्ठ अधिकारिणें सरबन्धत पुलसकर्मिणें गी निर्देश दिता जे ओह इलाके च लगातार सतर्कता बनाई रक्खन।



Janmashtami Prep

कल मनाए जाने आहले ठाँकरें दे वर्त यानि “जन्माष्टमी” दे त्यौहार दे मद्देनजर जम्मू प्रांत दे बजारें च बड़ी मती रौनक दिक्खने गी लब्बा करदी ऐ ते लोकें गी भगवान कृष्ण हुं'दिआं मूर्तियां, बस्तर, साज-श्रृंगार ते पूजा दा समेयान खरीददे दिक्खेआ जाई सकदा ऐ। इस पर्व लेई बजारें गी शैल-सनाकड़े ढंग्गै कन्नै सजाया गेदा ऐ। ठाँकरें दे बर्त दे मद्देनजर प्रशासन ने बंदश आहली चीनी डोर, जिसी गट्टू डोर बी आखेआ जंदा ऐ, दी बिक्री पर नेइमी तक्क रक्खी दी ऐ ते एहदी बिक्री ते इस्तेमाल करने आहलें दे खलाफ सख्त कार्रवाई कीती जा'करदी ऐ।



Prog. Announcement

आकाशवाणी दा क्षेत्रीय समाचार एकांश जम्मू 5 सितम्बर “राष्ट्रीय शिक्षक दिवस” दे मौके पर इक विशेष चर्चा प्रसारत करने जा'रदा ऐ जेहदे च स्हाड़े परोहने होगन। जम्मू-कश्मीर थमां 2026 बरे दे राष्ट्रीय शिक्षक पुरस्कार हासल करने आहले मोहम्मद अयाज़ रैणा। चर्चा दा विषे रौहग “गुरु -स्हाड़े असली पथ निर्माता”। 30एं मिन्टें दा एह कार्यक्रम शनिवारें 5 सितम्बर गी दपैहरी साइडे 12 बजे प्रसारत कीता जाहग। कार्यक्रम दी मेजबानी करगन स्हाड़े न्यूज एंकर जगमोहन शर्मा।

